


T 5237.5/1147

14

UNIVERSITY OF TORONTO LIBRARY
SERVICES INSTITUTE
127 SPADINA AVENUE
TORONTO,
ONTARIO
OCT 29 1955



中州集姓氏總目

第九卷

白先生賁一首

王內翰樞一首

睡軒先生趙晦一首

浚水王先生世賞四首

南湖靖先生天民一首

東臯桑先生之維一首

哈佛大學哈佛燕京
圖書館珍藏印

同治庚午
吳昌碩印

步元舉一首

馮文叔一首

張庭玉一首

宗道一首

鮮于溥三首

史士舉二首

王敏夫二首

王利賓一首

孫益一首

郝先生天挺一首

孫邦傑一首

張獻一首

徐好問一首

呂大鵬一首

高永一首

曹用之一首

趙達夫二首

邢安國一首

張溫一首

馬舜卿一首

劉曹王豫七首

杜丞相充一首

虞令公仲文一首

張丞相孝純一首

張左相汝霖一首

劉右相長言一首

右相文獻公耶律履一首

張平章萬公一首

董右丞師中一首

孫太師鐸一首

梁叅政瑄一首

賈左丞益謙一首

丞相壽國高公汝礪一首

胥莘公鼎一首

張左丞行中一首

楊戶部慥二首

鄭內翰子聃一首

孟內翰宗獻六首

趙內翰攄一首

趙文學承元一首

張太保行簡三首

張內翰楫四首

閻治中長言八首

李治中著一首

擬相先生王中立六首

王先生予可七首

照了居士王彧三首

無事道人董文甫七首

薛繼先一首

子之仲升子
玉各一首

中州集

卷之九

終

中州集卷第九

壬集

白先生賁

一首

賁亦人自號洪壽老自上世以來至其孫

淵俱以經學顯

客有求觀予孝經傳者感而賦詩

古人文瑩理後人但工文文工理愈暗絨扎何紛
紛君看六藝學天葩吐奇芬詩書分體制禮樂造
乾坤千歧更萬轍要以一理存如何臻至理當從

中州集
踐履論跋涉經險阻鑽研闢寒溫孝弟作選鋒道
德嚴中軍仰觀及俯察萬象入見聞不勞施斧鑿
筆下生烟雲高以君唐虞下以覺斯民君如不我
鄙時來對爐薰

王內翰樞 一首

樞字子慎良鄉人遼日登科仕國朝直史館
三河道中

十載歸來對故山山光依舊白雲閒不須更讀元

通偈始信人間是夢間

睡軒先生趙晦 一首

晦字光道管城人宋末代州法曹秀容主
簿汴京破後不復仕自號睡軒居士子洵
子都大定二十年進士真定路總管判官
孫綱三赴廷試以蔭補官終于永壽令曾
孫居禮之讓今在燕中

莫春

中州集
卷之九
歷枝梅子半青黃葉底殘紅雨褪香翠鈿舞風榆
落英綠鍼浮水稻抽秧酒濃猶覺春醒困睡美方
便午夢長苦被啼鶯訴花老揮毫聊作送春忙

浚水王先生世賞

四首

世賞字彥功汴人與尹無忌王逸賓趙文
孺相周旋明昌中保舉才能德行賜出身
擇褐鞞州教授終于鹿邑簿有浚水老人

集傳于世

立春後十日登樓

今日登樓眼風煙倍覺新溪梅初破葦屋雪半融
銀雁外天逾碧鷗邊水自春兒曹應見笑吟望獨
傷神

春雪

只謂春天暖寧知雪霰飛龍蛇且深蟄花柳不勝
威慘慘凌風細紛紛帶雨稀誰當問穹昊生殺果
何機

探梅

候得南枝破玉腮
心顏今日爲君開
細看苔迹無
行跡先賞應輸我
獨來

稱善齋

宦途馳逐只堪羞
何意須封萬戶侯
平日少游真
可念絕勝辛苦駐壺頭

南湖靖先生天民

一首

天民字達卿
滎陽人
其父國初官原武

而家焉
少日嘗兩魁鄉試
自望者不碌碌
所與交如龐才卿
楊茂才
劉之昂
王逸賓
皆一時名士
晚年買田南湖
葺亭園植竹
樹以詩酒爲事
自號南湖老人
年七十九
卒
子文煒
德昭
從孫顯子昂

西子放瓢圖

髻鬟蕭颯葦蘿秋
千古香溪水自流
吳越兵爭竟
何得風流輸與五湖舟

東臯桑先生之維一首

之維字之才恩州人蔡丞相伯堅之子壻也
也以樂府著稱有東臯集傳於世

白髮

白髮近年見十中三兩莖半因愁僨出多爲病添
成梳裏有時落緝餘還又生老知無可避何處是
功名

步元舉一首

元舉關中人

下第過榆次

栖遲零落未歸人已坐無成更坐貧意氣敢論題
柱客晨昏多負倚門親囊空漸覺錢餘貫衣敝翻
饒蝨滿身遙望秦關獨惆悵一天風雨落花春

馮文叔一首

文叔遼東人

客舍

禿襟袖褐破書囊十五年來客異鄉
生事穿中採虎尾窮途天上轉羊腸
三朝不遇馮唐老半夜悲歌甯戚狂
獨倚牛車望遼海西風塵土鬢蒼蒼

張庭玉 一首

庭玉字子榮易縣人能日賦百篇有集行

于世

即事

鳥鳶繞樹山梨熟蝴蝶穿花木槿開
赤脚城中借

善去蒼頭原上負薪來

宗道 一首

道守雲叟山陰人以足疾不仕有詩云家
藏千卷富身得一生閒茅屋經年補柴門
盡日關其自處可見

寶島僧舍

寂寂鍾魚柏滿軒午風輕颺煮茶煙
西堂竟日無人到只許山人借榻眠

中九集
蘇子溥

三首

六

蘇子溥

溥字彥仁宋文臣子駿之後高祖淳淳之
子孝標標之子壽吉壽吉之子坦皆擢進
士第而仕亦達彥仁坦之子以門資仕終
干櫟陽令濟源盤谷天壤佳處坦又子居
其間飲酒賦詩翛然塵垢之外至今人以
高士目之弟彥魯子忠厚今居鄉里

魯村道中

小橋沙路已堪圖更著衰翁跨蹇驢
暮寒日短秋容仍帶遠林疎鳴盤平野黃榆落
兔走橫岡白草枯漸喜閒身遠朝市一年強半在村墟

春日做舊詩體

年老逢春莫等閒逢春能得幾回看
插花儘要花枝滿把酒休辭酒琖乾
好向酒邊留舞袖不妨花外駐吟鞍
聞身健在須行樂燕語鶯啼春又殘

早發

燈前夢斷家千里馬上詩成月一痕
晨粥未烹官路遠隔林煙火是漁村

史士舉 二首

士舉字仲升滎澤人漢功臣弘肇之後高祖所賜鐵券故在其大又官濟源樂其山水因家焉又神山令數石碕牘進士仲升以蔭補官歷銅鞮三川兩縣令初任京兆錄事以歲旱擅開倉賑貧身往太一湫禱

雨尋獲嘉澍用是得名爲人雅重知義理
寒衣緩帶消搖山水間宛然一老書生也
貞祐之亂避于太行保聚失守老幼皆出
降仲升義不受辱投絕澗而死年七十九
孫庭玉字德秀今居山陽

趙化

石根寒溜迸珠璣尋丈驚看雪浪飛
我是玉川燴水客暫來盤礴亦忘歸

晉祠

小橋流水竹蕭森竹裏人家一徑深只欠東風小
籬落梅花疎淡月籠陰

王敏夫 二首

敏夫五臺人作詩工於賦物甚爲趙宜之
所稱雁門前輩中有許蛻子遷以武皇廟
詩著名又酒渴後四句云眼底恨無雲夢
澤胸中疑有沃焦山南窗花影三竿日指

點銀瓶照病顏有集傳河東往往稱此倪
民望字具瞻屏山所謂倪侯頭如筆其鋒
不可當 有種松詩云種松莫種柳種柳
莫種松堅脆非所計雅俗寧與同可是種
松無隙地却教憔悴柳陰中張韶九成寄
朔州苟輔臣云陳雷膠漆輕餘子楚漢風
雲屬少年李忠直卿賦雪云不將柳絮春
風比好作梨花月夜看至于蘇吉莘老李

鵬翼冲霄與具瞻之子冲儀詩文多可傳
喪亂之後惜不能記憶之矣

同東崑元先生論詩

林逋仙去幾年驚見梅花第二篇千歲冰霜松
骨瘦九秋風露鶴聲圓騰輝定出連城上得趣知
從太古前邂逅茅齋話終夕只疑人世改桑田

李氏友雲樓

霧幕烟迷十二欄壺觴招我一躋攀黃簾卷起湘

川竹分得西州數點山

王利賓 一首

利賓字茂實襄城人朴直純素作詩有古
意似其爲人然亦未嘗以示人也家與衛
昌叔隣居而不相往來計平生所交惟不
肖而已予一日過襄城知茂實病就卧內
候之乃見壁間所黏五言古詩十數首竄
改重疊往往可傳然後知茂實所以交予

者特以詩故耳渠既不言予亦無從知之
惜登時不騰寫今忘之矣

題扇頭

輕紗画竹雀柄短不盈握暑氣正憑陵清風一何

邈

孫益 一首

益字德裕秀容人嘗從先大夫學詩

送張安中還雲中

名保極雲
朔名七

相送還相送臨分手重分驂
驕欣得路鴻雁惜離群
木落黃華露城低紫塞雲
中秋月正好千里謾思君

郝先生天挺 一首

天挺字晉卿陵川人家世儒素伯父子颺
有詩名號東軒老人先生少日有賦聲早
衰多疾厭於名場遂不復就舉貞祐之兵
避于河南往來淇衛間為人有崖岸耿耿

自信寧落薄而死終不一徇富見之門年
五十七卒於舞陽臨終浩歌自得不以死
生爲意其平生自處爲可見矣好問十四
五先人令陵川時從先生學舉業先生教
之曰今人賦學以速售爲功六經百氏分
磔綴緝外或篇題句讀之不知幸而得之
不免爲庸人況一敗塗地者乎又曰讀書
不爲藝文選官不爲利養唯通人能之又

曰今世仕宦多用貪墨敗官皆苦於飢凍
不能自堅者耳男子生世不耐飢寒則雖
小事不能成子試以吾言求之先生工於
詩時命好問屬和或言令之子欲就科舉
詩非所急將無徒費日力耶先生曰君自
不知所以教之作詩正欲渠不爲舉子耳
子思溫字和之孫經字伯常今居順天

送門生赴省闈

青出於藍青愈青小年場屋便馳聲未饒徐淑早
舉却笑陸機遲得名嗟我再衰空眊矚喜君初
筮已嶧嵎此行占取鰲頭穩平地烟霄屬後生

孫邦傑一首

邦傑字伯英雒州容城人曾祖堅國初有
功官至隴州刺史伯英少日住太學有時
名所與游皆名士興定初知世將亂棄家
為黃冠師

燒筍

煨茁舊聞山谷語勸畊還憶大蘇詩傳將火候無
多訣留得天真又一竒未放錦襖開束縛已看玉
版證茶毘白麻初拜驚燒尾見此應慙富貴癡

張獻一首

獻字君玉大名朝城人嗜作詩年已老而
刻苦殊未減為人謹愿有禮見稱諸公間
卒年六十八子鏞鎮今居鄉里

送侯道士

十年走南北黃塵汗人衣
翩翩夜啼鳥一枝無可依
問君何所如鳧鳥東南飛
恨我不得往失脚穿與機
從君知不能一笑人間非
何水無蒲魚何山無蕨薇
終當拂衣去往叩雲山扉

徐好問一首

好問字裕之永寧人

龍門

鑿而來道路通行人
萬古翠微中南山山寺
詩滿一字何曾到禹功

呂大鵬一首

大鵬字鵬舉密縣人
自言宋名相申公之裔
宣宗頻歲南伐鵬舉作詩
欲以撼主兵者云縫掖無
由挂鐵衣劍花生澀馬空
肥燈前草就平南策一夜
江神泣涕婦其以氣岸自
許皆此類也

夏日

北渡
後作

旋移石枕拂藤床
細洒槐陰趁晚涼
大地教嗷困
爐鼎老天不肯下殘陽

高永一首

永字信卿出于盤陽大族父元字善長教
信卿作舉子讀書畧通即棄之去爲人不
願細謹有幽并豪俠之風賓客入門則盡
家所有者爲具不爲明日計人以此愛之

貞祐初避兵太原與李長源居于廣平寺
有盜穴墻而入長源性恒怯聞騷窳聲噤
不敢語盜盡挈信卿所有而去長源徐曰
綠林之子至矣於是信卿生理大狼狽南
渡居嵩州出入屏山之門其學遂進初名
夔字舜卿又名揆屏山改焉真定王之奇
士衡攻雜學屏山目爲怪魁王從之內翰
爲賦善笑詩奉聖馬餌升公敢爲大言著

書十萬言號北新子大畧以談兵爲主且
曰古人兵法非不盡但未有北新子五十
里火雨耳信卿皆與之游故其詩豪宕譎
怪不爲法度所窘有冰柱雪車風調觀咀
龍篇及大雨後見寄可槩見矣正大壬辰
病沒于京師年四十六

跋賈天升所藏段志寧山水

蒼壁雲氣湧長松風雨寒湍流壁山出玉虹飲溪

胸中無雲夢筆底無江山想見破墨初布袖蚊
龍蟠壯觀駭心魄萬象本自閒寒齋靜相對遠意
空追攀

曹用之 一首

用之歸德人幼有賦聲屢中甲乙詩亦有
功嘗戲作鬼仙語云瀏瀏竹間雨熒熒窗
下燈相逢不相顧含淚過巴陵詩有本事
中山楊正卿能道所以然真人作鬼語也

憶舊

花鳥巡簷喚曉晴
喚來和氣滿春城
春風二十年
前客煮酒青梅也
後生

趙達夫

二首

達夫太原人性嗜讀書而不事科舉南渡
後居維氏山中安貧守分故終世窮悴壬
辰之兵遇害

紅梅

湖句好已成塵蠟點都能幾許春
乞與瓊兒薄
梳洗才情留待月中人

柳

楊柳攏春不耐秋
十分憔悴儘風流水邊沙際風
烟冷收拾殘陽合算愁

邢安國

二首

安國字仲祥沁州武鄉人少日有賦聲四
十歲後即不應科舉以詩酒自娛避亂客

泌陽十餘年後北歸備極艱苦其見於詩者如此往時李長源傳仲祥柳花一詩渠甚愛之今以丹崖集枝之與傳者不同當是長源曾與商畧之耶

楊花

細點輕團轉復飄隋家堤岸霸陵橋非綿非絮寒無用如雪如霜暖不消狂惹客衣知有恨巧尋禪榻故相撩陂塘回首浮萍滿依舊春風擺翠條

過唐州西李口

白沙翠竹溪上村漁家賣魚喚行人西風吹皺一溪水水光日影金鱗鱗

張溫一首

溫字元佐上黨人祖仲容字才翁宋末登科仕至屯田員外郎以好士名天下致仕後有詩云病身衰退謝明朝北洞閒眠晝寂窠十畝晚禾煙冉冉一林脩竹雨瀟瀟

黑花遮眼秋不落白雪撲頭春未消世事
悠悠吾老矣一壺濁酒且逍遙至今爲鄉
里所傳元佐泰和六年李演榜乙科登第
詩樂府俱有名于時

感懷一首

彌月不出門出門沙漲東風昏老樹擺撼轟雷奔
鬼物叫嘯山前村僞居客子驚心竟歸來繞屋尋
蘭蓀蘭蓀落索靈苗髡主人醉倒老瓦盆衣袖半
帶淋漓痕芸芸蕭艾同歸根天生天殺何怨恩糟
床與翁共清渾絕勝被髮叫帝閭

馬舜卿一首

舜卿名肩龍以字行宛平人先世遼大族
有知興中府者故又號興中馬氏祖大中
國初登科節度全錦兩州又成誼字耳之
張楫榜登科京兆路統軍司判官舜卿在
太學有賦聲宣宗初人有告宗室從坦殺

人從坦字履道一時賢將帥處猜嫌之地
人以為必死而不敢言其冤舜卿以太學
生上書大畧謂從坦有將帥材方今人物
無有出其右者臣一介書生無用於世願
代從坦死留為天子將兵書奏詔問汝與
從坦交分厚耶舜卿對臣知有從坦而從坦
未嘗識臣從坦冤人不敢言臣以死保之
宣宗感悟赦從坦授舜卿東平錄事委行
臺試驗宰相侯莘公與之語不契留數月
羅婦將渡河與排岸官紛競筐中搜得軍
馬糧料名數及利害事目疑其姦人之偵
伺者繫婦德獄根勘適從坦至立命出之
正大四年冬薄游鳳翔德順州將愛申以
書招舜卿舜卿欲往鳳翔總管以敵兵勢
甚張吾城可恃德順不可守勸勿往舜卿
曰愛申平生未嘗識我一見為知己我知

德順不可守我往必死然以知己故不得
不死也乃舉行囊付族父明之爲死別冒
險而去既至不數日受圍城中義兵七八
千而已州將假舜卿鳳翔總管判官守禦
一以妻之凡受攻百日食盡乃陷軍中募
生致之不知所終時年五十三詔贈某官
配食襄忠廟舜卿年少時過襄垣題詩酒
家壁辭氣縱橫時輩少有及者如云玉鞭

再過長安道人面依前似花好殷勤勸我
梨花春要看尊前玉山倒他語類此

會州道中

山腰薄雪眩朝暎未放陽和入燒痕一片長安世
情月梨花院落幾黃昏

○諸相

劉曹王豫 七首

豫字彥由阜城人仕宋知濟南府事汴京

下立張邦昌爲大楚皇帝宋滅楚更立彥
由國蹠齊建元阜昌八年廢爲蜀王遷黃
龍府改封曹有集十卷行于世子麟猗孫
通海陵潮叅知政事四世孫瑛今在太原
雜詩六首
竹塢人家瀕小溪數枝紅杏出疎籬門前山色帶
烟重幽鳥一聲春日遲

又

古驛他時說著也愁人

杜丞相充一首

充字公美相州人仕宋知滄州歸國拜尚
書右丞相領中山行臺以壽終

塵

汨汨勞生爲爾忙只除不到白雲鄉步回洛浦生
羅襪歌斷秦樓菽杏梁閒撲衣襟迷遠望靜穿窗
隙鎖斜陽帝城別有風流在輦路春風十里香

虞令公仲文 一首

仲文字質夫世南之裔武州寧遠人仕為
憲相歸朝授樞密使平章政事封秦國公
四歲作詩賦煎餅有魚目蟬聲之句人以
神童目之

雪花

四歲作

瓊英與玉蘂片片落前池問著花來處東君也豈
知

風荷柄柄弄清香輕薄沙禽落又翔紅日轉西魚
艇散一川山影暮天涼

又

古渡停驂日向沈淒涼歸思梗清吟碧山幾點塞
天濶紅葉一林秋意深

又

倚崑蕭寺據危崖丈室軒窗面水開雪霽暮寒山
月上數竿脩竹一枝梅

又

晝色晴明著色圖山光凝翠接平湖煙嵐自古人
難画遠即深深近却無

又

寒林燼重暝樓鴉遠寺疎鍾送落霞無限嶺雲遮
不斲數聲和月到山家

客館

雪消北嶺安排暖寒入東風阻節春絕塞亂山圍

張丞相孝純 一首

孝純字永錫滕陽人宣和末知太原國兵
圍守踰年人相食幾盡乃下朝廷怜其忠
換相職後以相齋致仕汴京建行臺起為
左丞相踰年得請歸鄉里二兄尚安健鄉
人為作三老圖薨謚安簡子公藥字元石
昌武軍節度副使致仕孫觀字彥國世為
文章家曾孫厚之字茂弘承安二年進士

中運使寄酒清明日到以詩謝之

芳樽到日恰清明似與嘉辰默計程擬助林園延
勝賞肯容桃李落繁英老來官爵渾無味閒裏
盤却有情見說使車臨岱麓儻能相過共飛觥

張左相汝霖 一首

汝霖字仲澤遼陽人家世貴顯又浩字浩然以門資仕揚歷中外遂升端揆進拜太師封南陽郡王五子仲澤平章政事莘國

公汝為字仰宣河北東路轉運使汝翼仕不達皆進士也汝方字仲賢自號丹華老人汝猷字仲謀俱至宣徽使父子兄弟各有詩傳於世王子端內翰太師之外孫其淵源有自云

春溪一首

黯黯春愁底處消小桃無語半含嬌東風不管前
溪水暖綠溶溶拍画橋

劉右相長言 一首

長言字宣叔東平人宋相莘老之孫而學
易先生斯立之猶子也又蹟年三十五終
於儀真令工詩能文有南榮集傳東州今
獨余家有之宣叔正隆宰相詩文能世其
家今不復見矣

通叔以詩送古鏡爲長言生日之壽次韻謝
之

綵衣祿隱非臞仙猶有向來文字緣都城一別兩
歲晚寄聲勞苦常相先人間始生俗禮重而我永
感方頽然遠憑詩句致竒物欲挽算景迴虞淵規
摹九寸函大方古製不作菱花妍開奩拂拭愧醜
質但喜虹氣浮晴天夫君久要心不遷期與鐵杖
論清堅保身賴此孤月圓明年上印歸行田

右相文獻公耶律履 一首

履字履道東丹王之七世孫學通易太玄

至於陰陽歷數無不精究嘗以鄉賦一試
有司以露索爲耻遂不就舉蔭補國史掾
興陵朝累遷薊州刺史入翰林爲脩撰歷
直學士待制禮部尚書特賜孟宗獻榜進
士第俄預淄王定冊功拜叅知政事明昌
元年進右丞薨年六十一興陵嘗問宗名
臣孰爲優履道以蘇端明軾對上曰吾聞
軾與王詵文甚款至作歌曲戲及姬侍非

禮之甚尚何足道耶履道進曰小說傳聞
未必可信就使有之戲笑之間亦何得深
責世徒知軾之詩文人不可及臣觀其論
天下事實經濟之良才求之古人陸贄而
下未見其比陛下無信小說傳聞而忽賢
臣之言明日錄軾奏議上之詔國子監刊
行自號忘言居士有集傳於世三子辨才
武廟署令善才工部尚書楚才中書令四

孫鈞鉉鑄

史院從事日感懷

不學知章乞鑑湖不隨老阮醉黃墟試從麟閣諸
賢問肯肩蘭臺小史無一箴得矣輸妄尉長身奉
栗魂侏儒禁城鍾定燈花落坐拊塵編惜壯圖

張平章萬公一首

萬公字良輔東阿人正隆二年進士仕長
山今有惠政人為立祠人為右司員外郎

太師淄王愛之許以宰相器明昌初累遷
御史中丞以言事忤旨除彰國軍節度使
召為大興尹拜叅知政事以母老丐歸養
出判東平河中濟南下內艱起復擢平章
政事封壽國公為相知大體有敦龐耆艾
之目既致政而眷顧未衰復起判濟南安
撫山東便宜行事未幾得請薨於家謚文
貞繪像衍慶宮配享章宗廟廷

戊戌二月中旬登稷山清榭

問囚推案朝還算危坐不知春淺深今日檐間看
風色一株紅杏暗驚心

董右丞師中一首

師中字紹祖邯鄲人後徙洛州皇統九年
進士承安中入政府直道自立而以通材
濟之泰和初元妃李氏方寵幸兄喜兒為
宣徽使有楊國忠之權一日德州教授田

庭方上書言事云大臣持祿近臣怙寵此
言路之所以塞也道陵頌謂紹祖言大臣
持祿當謂公等近臣怙寵者為誰時喜兒
侍立殿上紹祖倒笏指之曰莫非謂李喜
兒之屬否上頷之紹祖嘗言作宰相不難
但一心正兩眼明足矣少日以談諧得名
及在相位亦未嘗廢談笑然不害其為國
朝名相也俄致政賜第京師後三年薨有

燕賜邊部詩傳於世紹祖師王內翰彥潛而與之同榜登科彥潛沒後待其子恩禮殷重不減骨肉論者謂孫鐸振之事其兄明之張穀伯英愛其弟伯玉舉世無與為比至於紹祖之待其師之子則古所未有也

自臨洮還

臨潭仍是漢家城

漢家城在臨潭羌人所稱

積石相望十驛程

西畧河源東並海此身何地不經行

紹祖之孫濟剛記此詩末

句又作塵埃風雨歎勞生

孫太師鐸一首

鐸字振之恩州人大定十三年進士明昌

中擢戶部尚書時已有相望及考滿以戶

曹繁重且未有可代者特旨進一官再任

而同列二人俱以入相矣振之賀席中戲

舉青州老柏院布衣張在詩云南隣北里

牡丹開公子王孫去不回惟有庭前老柏
樹春風來似不曾來爲御史所劾降授同
知河南府事有以詩送之者云想到洛陽
春正好南隣北里牡丹開聞者皆大笑振
之後入政府遷尚書右丞薨贈太子太師
作詩甚多其賦玉簪有披拂秋風如有待
衰回涼月更多情之句甚爲詩家所稱

癸未清明日

儵然一室暗塵凝兀兀端如打坐僧習氣未除私
自笑短檠還對讀書燈

梁叅政瑄

一首

瑄字國寶別字瑩中范陽人大定十六年
進士歷州縣稍遷警巡使治尚嚴肅權貴
欽迹朝廷知其才累試繁劇由中都路轉
運使拜戶部尚書俄叅知政事資方立敢
言大事北兵動立和議人有笑其懦者卒

如其言未幾薨於位虎賊咤曰梁瑋在族
矣其爲人可知

留題長平驛

秦趙均爲失霸圖起何殘忍括何愚殺降未見無
禍者累將其能有種乎日暮悲風噎丹水夜深寒
月照頭顱山名快心千載杜郵劍人所誅耶鬼所
誅

賈左丞益謙一首

益謙字亨甫本名守謙避哀宗諱改爲宣
宗朝叅知政事出知濟南移鎮河中南渡
後召拜左丞尋致仕居鄭州哀宗即位史
官乞回宣廟實錄遂及衛紹王初虎賊旣
弒逆乃立宣宗宣宗之人至謂衛王失道
天命絕之虎實無罪且於主上有推戴之
功獨張信甫上章言虎賊大逆不道當用
宋文帝誅傅亮徐羨之故事章奏不報爾

後舉朝以大安崇慶之事爲諱及是謂之
甫大安中嘗拜御史中丞宜知衛王事乃
差編脩官一人就訪之亨甫知其旨謂來
者言知衛王莫如我然我聞海陵被弑而
世宗皇帝立大定三十年禁近能暴海陵
蟄惡者得美仕史官脩實錄誣其淫毒狼
鶩遺臭無窮自今觀之百可一信耶衛王
勤儉慎惜名器較其行事中材不能及者

多矣吾知此而已設欲飾吾言以實其罪
吾亦何惜餘年朝議偉之正大三年年八
十薨子賢卿頤卿翔卿皆以門資仕今一
孫仲明在東平

贈答史院從事

見說才名自妙年多慙政府舊妨賢物華天寶無
今古鳳閣鸞臺孰後先鄭圃道尊何敢望濟南書
在子當傳莫言老眼昏花滿及見風鵬上九天

丞相壽國高公汝礪一首

汝礪字崑甫應州金城人大定中進士揚
 歷中外居戶曹三司為最久相宣宗十年
 小心畏慎夙夜匪懈篤于古人造膝詭辭
 之義謀謨周密人莫得而聞元光末宣宗
 上仙公亦薨於位君臣之契義均同體者
 於斯見之平生嗜讀書南渡之後機務倥
 惚未嘗一日廢書不觀臨終留詩有寄謝

東門千樹柳安排青眼送行人之句時年

七十一謚口配享宣宗廟庭至今士論謂

公才量渾厚足為守成之良相恨所遭不

時耳

雨後

時雨雨三日田家家萬金有年天子慶憂國老臣

心

胥莘公鼎一首

鼎字和之代州繁峙人又持國大定中爲
 太子司藏有功母后家章宗即位擢拜尚
 書右丞和之大定二十八年進士至寧初
 都城受兵由戶部尚書參知政事宣宗即
 位除泰定軍節度使不赴改判大興貞祐
 二年拜尚書右丞車駕南渡出爲汾陽軍
 節度使移知平陽權河東南路宣撫使回
 年授樞密副使權右丞兼職如故五年正

月朝京師進平章政事封莘國公行臺關

中未幾兼左副元帥明年以溫國公致政

封英行臺衛州以病薨於位雷希頌爲作

神道碑云黃霸爲良吏稱首及爲丞相與

張敞論列功名大減王允當漢祀之衰計

誅董卓近古社稷臣然不赦涼州人旋致

催汜之禍蕭俛之清介崔植之論議皆足

爲唐名臣而俛議銷兵植餓朱克融輩不

昇一官遂再亂河朔彼或量不足或才畧
 有所窮權不足以濟事智不足以知時故
 也以姚崇之賢惟其不知道未免為揀時
 之相其他可知也國家有通明相曰英國
 胥公尚兼數公之長予謂希顏此論似涉
 過差至於為國朝名相以度量雄天下則
 在公為無媿矣在長安日乞致仕表云興
 造功業方聖主有為之時表裏山河豈愚

臣養病之地送弟有之云世事正須高著
 眼宦途休歇少低頭他文類此弟恒常之
 子嗣祖今在燕中

送弟恒作州

男子四方志人生五馬榮君恩何以報民政不宜
 輕御物當存恕存心要盡誠勿矜新彌令姑守舊
 章程歛暴單貧困囚淹狡偽萌慈柔難禁暴苛急
 必傷生東郡吾將老西陲敵未平一生能幾別四

事果難并方此對床樂愴然分袂驚荒詩何足記
聊寫弟兄情

張左丞行中 一首

行中字信甫莒州日照人祖莘鎮西軍節
度副使父暉御史大夫以武安軍節度致
仕兄行簡易無體榜第一人信甫大定二
十八年進士衛紹王朝虎賊已除名爲民
賂遺權貴得復用信甫言其必反及弒逆

自爲太師尚書令澤王信甫時爲禮部尚
書人謂必爲所殺甚危之一日虎下禮部
鑄監國寶信甫持不可虎雖怒然亦竟不
能殺也宣宗即位授叅知政事丞相高琪
專權用事聲勢焰焰人莫敢仰視議論之
際唯信甫與之抗朝廷稱焉所居拙軒有
爲作銘者其引云發凶豎未形之謀則先
識者以爲明犯強臣不測之威則疾惡者

以為剛蓋實錄云元光末出為靜難軍節
 度使哀宗即位首命召之遷尚書左丞後
 二年致政卒於崧山之崇福宮信甫家世
 儒素雖位宰相而奉養如寒士日書經史
 五百字為課寒暑不廢者四五十年故於
 書無所不讀詩殊有古意也

右丞文獻公所画張果像

古采人物画為難驚見仙公樹石間莫把丹青名

右相太平勲業在人寰

楊戶部慥二首

慥字炆玉代州五臺人承安五年進士歷
 州縣入為尚書省令史拜監察御史侍御
 史京西大農司丞京南司農卿戶部侍郎
 權尚書自入戶曹即有相望資雅重事無
 巨細處之皆有法至於知朝廷大體則又
 非他人所能及也京城受兵權叅知政事

明年卒於河平叔玉文工於詩而人不以能文稱特未見其文耳

過司竹監有懷王監正之

不見崧丘跨鶴仙才名留得萬人傳春郊瀆酒傷
今日夜雨論文記昔年宰樹護懸公子劍高山已
絕伯牙絃故居脩竹青青在寂莫終南落照邊

乾陵

牝雞一啄血波流天下何緣不姓周今日阿婆心

力盡乾陵秃似老僧頭

○狀元

鄭內翰子聃 一首

子聃字景純大定人少日有賦聲時輩莫與為敵天德三年第三人登科士論仍以爲屈而海陵不之許也正隆二年詔景純再試擇能賦者八人先以題付之以困景純且將視其中與否罪賞之

却題天賜勇智正萬邦海

陵謂侍臣漢高祖諱不避之可乎乃改作萬國及開卷景純果第

一人楊伯仁張汝霖中選劉幾基哉李師

顏輩皆被黜海陵終不以景純為工與被

黜者兩罷之趙獻之賀赦云丹桂一枝不

失舊物青錢萬選無媿古人其為名流所

稱道如此累官吏部侍郎改侍講學士卒

其賦餘醪有玉斧無人解脩月珠裙有意

欲留仙之句甚為詩家所稱

即事

一錢不直程衛尉五斗解醒劉伯倫讀罷離騷解

衣卧門前花柳自爭春

孟內翰宗獻 六首

宗獻字友之開封人大定三年鄉府省却

四試皆第一供奉翰林曹王府文學兼記

室參軍以疾尋醫久之授同知潭州軍州

事丁母憂哀毀致卒劉無黨題其詩卷後

云簪紱忘情累山林閱歲陰選官堂印手
說法老婆心友之深世路嗟前却人生變

古今公乎真不死名姓斗之南相人孔嗣

訓挽云二十年間事才名一夢新衰羸驚

喪母哀毀竟亡身竟返愁楓夜情留淚草

春黃公酒壚在此去只悲辛汴人高公振

特夫云見說平生夢前途盡目前友之未

中預見前途所乘除雖有數凶禍竟何緣

禮樂三千字才名二十年仁人遽如許無

路問蒼天又云誰謂詩成識清冰果自焚

友之雪燭詩固知劫火終無盡人嗟埋玉

誰謂清冰也自焚未幾下世

樹天為落文星友之隣含李生言六月中

連二明星隕於友之所居

生於出處之際死生之變造物者皆使之

前知其以天下重名界之者為不偶然云

龔平甫森玉軒

古人借宅亦種竹大是饗竒心未足高齋聞有萬
琅玕坐對懷山飲秋綠官閒勝日無一事尊酒不
空仍有肉他時剝啄叩君門高枕矮床容我宿

舊蓄一琴棄置者久矣李君仲通爲張絃料
理仍鼓數曲以詩贈之

我家箏奴憂樂同塵埃滿面鬢髮蓬徽絃不具挂
墻壁似慙無以娛衰翁夫君一見爲披拂坐使寒
谷回春融中含太古意味足雜以新態來無窮繁

聲流水不可喻直與造化相冥通形神久已坐灰
稿一旦抉剔驅盲聾寂然反聽杳難詰但覺萬竅
俱玲瓏千金不得和扁力誰謂起廢由枯桐曲終
玄旨竟誰會非絃非指仍非空拂衣欲往君且止
爲我乘興彈悲風

張仲山枝巢

達人孤高與世疎百年直寄猶須臾歸來掩關聊
自如人之不足等有餘樂哉下視濠梁魚逍遙自

中州集 四十二 漢古階
契蒙莊書異時馭氣游太虛我知枝巢亦蘧廬

柳塘

摇摇風影漾寒塘靜裏亭臺日月長不似隋家堤
岸上亂鴉殘照管興亡

蘇門花塢

繞舍雲山慰眼新看花差後洛陽塵從君小築繁
香塢不負長腰玉粒春

閏月九日

南崖烘暖貯秋光勝處相公醕一觴俚諺難逢兩
寒食潤餘今值小重陽頭風比似常年愈菊面渾
如去歲黃老矣歡遊定能幾佳時此樂最難忘

趙內翰攄一首

攄字子充宛平人自號醉全老人

早赴北宮

蒼龍雙闕鬱層雲湖水鱗鱗柳色新絕似江行看
清曉不知身是趣朝人

趙文學承元一首

承元字善長先世汴人兵火間寓旅河間
遂占籍焉大定十三年詞賦第一人除應
奉翰林文字兼曹王府文學以疎俊少檢
得罪王府貶廢久之遇赦量叙卒於臨洮

探春

冰底流泉匹練飛麴塵著柳不禁吹杖藜恰到春
生處已有人家插酒旗

張太保行簡

三首

行簡字敬甫大定十九年詞賦第一人家
世儒臣備於禮文之學典貢舉三十年門
生徧天下南渡後遷禮部尚書太子太保
翰林學士承旨薨謚文正楊內翰之美銘
其墓稱敬甫天性孝友太夫人疾不解衣
者數月居喪哀毀過禮事其父御史大夫
自幼至終未嘗少違顏色與諸弟居三十

餘年家門肅睦人無間言率勵子弟不知
爲驕侈雖處富貴與素士無異平生無汎
交無私謁慎勤周密動循禮法居無怠容
口無俚言身無徑行雖古君子無以加故
天下言家法者唯張氏爲第一言禮樂言
文章言德行之純備者亦唯張氏之婦有
集三十卷傳於家敬甫賦燕云王氏烏衣
巷盧家白玉堂寒食云餠粥唯毬留故事

風花鬢柳鬧春城中秋云露凝灑氣露瑤
席雲近清光護桂宮此類甚多也

六月二十九日北宮朝回

疎柳衰荷又一時清波飛葉夢靈芝年年踏盡溪
邊路不覺吳霜點鬢絲

酬郭光秀才

疇昔君來事已睽豈知今我又羈栖波臣儻不辭
升斗鵠卵終當遇魯雞

題子端雪谿小隱圖

出處皆天豈自由仙標終合冠
黿頭不妨貌取黃
華景時向鈴齋作卧游

張內翰檝 四首

檝字巨濟先世秦州長春人有官於山陰
者遂占籍焉曾祖頤宗銀青榮祿大夫祖
惠懷遠大將軍父美白號縣簿巨濟明昌
五年詞賦第一人仕至鎮州刺史為文

有蘊藉善談論文賦詩筆截然有律度時
人甚愛重之陝州詩云駭浪奔生馬荒山
卧病馳永寧劉氏園亭云菊老芙蓉衰
柿葉爭絳叩門人不應一犬吠深巷此類
甚多

秋興

飄零千里道半落半生愁殘月如新月
今秋似去秋
露濃花氣重風細竹聲幽何日清溪上
煙蓑一

釣舟

客中

絳脣花不語青眼柳初眠塵去尋芳馬香來載酒
船歸期仍雁後野興已鷗邊惆悵無家客春風又
一年

蓮實

水妃擎出紺珠囊玉筍彫槃喜乍嘗膚白已攪新
藕嫩心青猶帶小荷香鬪餘翠鳥零玳羽飛盡黃

蜂露蜜房口腹累人良可笑此身便欲老江鄉

初夏

小園綠筍間朱櫻點綴年華似有情露浥葛巾晨
氣潤風隨竹簟晚涼生閒窺點鼠潛身處靜厭飛
蚊遠鬢聲安得冷泉幽石畔解衣盤礴樹陰清

閻治中長言

八首

長言字子秀濟南長清人客居兗州之嵒
陽祖俊行臺南榜又時昇任忠傑榜曾高

以來登科者六世矣子秀少日慕張忠定
 之為人故名詠避衛紹王諱改焉幼孤養
 於從祖能自振厲好學工詞賦閒有前人
 句法性本豪俊使酒任氣及游京師乃更
 折節遂以謹厚見稱酒酣耳熱故態稍出
 嘗以第一流自負屏山獨深知之不以為
 過也平生多奇夢果魁天下士論厭服在
 翰苑十年出為河南府治中被召以道梗

不得前卒於亳州子魯瞻魯安今一孫在

洛州

北齊行

天保大人齟世貴未待齊成已無魏識裏方傳近
 水羊夢中先兆攻城蝟六君三世都能幾二十八
 午翻手裏細思孝靜靈運詩天道好還非妄矣

應制中秋

璧月當秋夜未闌漢宮高會浹宸歡塊蘇塵世三

千畧珠翠瑤光十二欄桂實飄香浮壽筭露華零
潤溢仙槩都人側聽雲韶奏共指天家是廣寒

婆速道中書事

此地先經戰人生苦未聊泉源疏地脉田壠上山
賈敗石平危徑枯柴補短橋曉烟明遠爨暮雪暗
歸樸履滑心頻悸梯危骨欲消解鞍空倒卧無夢
訖通宵

送鵬酒麗橙與秀實御史

驄馬朝回画閣深遥知春意領梅心麗橙嬌軟服
尊小聊助風流對淺斟

闔立本職貢圖

諤諤昌周此一書形容葵貢寫成圖寧知右相無
深意莫指丹青便厚誣

盤山招隱圖

画出中盤望隱歸鳴珂朝馬尚遲遲賦詩未敢輕
相誚却恐吾山也勒移

三門集津圖

津門未爲天下險勿作駭相觀茲圖偃月堂中李
林甫有人能寫此心無

丁氏思祖亭

鶴野三千里鳧函五百年人間仍舊德龜筮得新
阡族屬東州望衣冠鼻祖傳異時誰式墓應識子
孫賢

李治中著 一首

著字彥明真定人高才博學詩文得前
體工於字畫頗尚玄言承安二年經義第
一人在翰林七年出副定州召爲戶部員
外郎坐大中黨事謫臨洮府判官量移西
京路按察司判官遷彰德府治中城再陷
避于塢上兵人招降大罵不從掘塢倒而
死

觀音院書閣

門巷蓬蒿一尺深
小軒岑寂似山林
鳥聲落枕有高下
山色闖人無古今
客裏三年侵老境
床頭一易浣塵襟
晚涼瘦坐忘言裏
滿地西風白玉簪

○異人

擬栩先生王中立 六首

中立字湯臣岢嵐人博學強記問無不知
少日治易有聲場屋間家豪于財賓客日
滿門所以待之者備極豐腆其自奉則日

食淡湯餅一杯而已年四十喪妻遂不更
娶亦不就舉選齋居一室枯淡如衲僧如
是三四年乃出時人覺其談吐高濶詩筆
字畫皆超絕若有物附之者問之不言也
閒閒趙公知平定先生往謁之與之詩云
寄語閒閒傲浪仙枉將詩酒污天全黃塵
遮斷來時路不到蓬山五百年回言唐世
士大夫五百人皆仙人謫降中有爲世味

所著迷而不反者如公與我皆是也一日
來都下館於閒閒公家中秋夜飲酒賦詩
且就公索墨水一槃公如言與之明日不
告而去壁間留龜鶴二字廣長一丈而墨
水具在不知以何物書之也朝士來觀者
車馬填咽都下競傳王先生仙去矣久之
先生從外至問二字以何物書之不答題
詩其旁云天地之間一古儒醒來不記醉

中書有人錯比神仙字只恐神仙字不如
先生平生詩甚多有醉袖舞嫌天地窄詩
情狂壓海山平之句他亦稱此人有問世
外事者亦一二言之好作擘窠大字往往
瞑目爲之筆意縱放勢若飛動閒閒公甚
愛之屏山嘗見先生商畧前代人物引先
儒論議數十條在目前如人人自相詰難
然後以已意斷之以爲辨博中第一流人

也臨終預尅死期如言而逝州將石倫葬
 之忻州時年五十六予嘗從先生學問作
 詩究竟當如何先生舉秦少游春雨詩云
 有情芍藥含春淚無力薔薇卧晚枝此詩
 非不工若以退之芭蕉葉大梔子肥之句
 校之則春雨為婦人語矣破却工夫何至
 學婦人先生晚年易名雲鶴自號觀桐不

中秋

素丸東溟來飛上玻璃盆聊揮五輪手撥去萬里
 陰印透山河影照開天地心人世有昏曉我未嘗

古今屏山所傳作素純青
 溟來聯舒五輪指

雜詩四首

華山宮殿白雲封不見當年打睡翁貪看終南山
 色好不知紅日下前峯

又

獨跨蒼虬下太清春風萬里月華明
 回君感激為

若說鑿破天機我也驚

又

雲葉粼粼縠碧空笙簫遍響入天風忽驚風浪耳
邊急不覺形神來世中

又

此生休更問浮名名利區區不暫停我有一丸天
上藥用時還解濟蒼生

題裕之樂府後

常恨小山無後身元郎樂府更清新紅裙婢子那
能曉送與凌煙閣上人

王先生予可

七首

予可字南雲吉州人父本軍拔南雲亦嘗
隸籍年三十許大病後忽發狂久之能把
筆作詩文及說世外恍惚事南渡後居上
蔡遂平郟城之間在郟城爲最久遇文士
則稱大成將軍於佛前則諦摩龍什於道

則騶天玄俊於貴游則威錦堂主人爲人
軀幹雄偉貌亦竒古戴青葛巾項後垂雙
帶狀若牛耳一金鏤環在頂額之間兩頰
以青涅之指為翠靨衣長不能掩脛故時
人有哨腿王之日落魄嗜酒每入城市人
爭以酒食遺之夜宿土室中夏月或以穢
在旁蛆蟲狼藉不卹也人與之紙落紙數
百言或詩或文散漫碎雜無句讀無首尾

多六經中語及韻學家古文竒字字畫峭
勁遇宋諱亦時避之人或問以故事其應
如響諸所引書皆世所未見談說之際稍
若有條貫則又以誕幻語亂之麻知幾張
伯玉與之游最狎說其所詩以百分爲率
可曉者才二三耳題崧山石淙云石裂雲
華清月秋蓋石淙之石皆狀若湖玉其高
有五六十尺者石之文如蟲蝕木如太古

篆籀奇峭秀潤一一在潭水中親到其處
 知詩為工也蔡州北懸壺觀仙榆云壺樹
 苔波月漬皴醉後云一壺天地醒眠小宮
 體云萬疊雲山飛小雁射虎首句云風色
 偃貂裘即閣筆自戲云此虎來矣樂府云
 唾尖絨舌淡紅甜又自戲云欲下犁舌獄
 耶和太白宮詞云金盆水不暖翠雀啄晴
 苔又云鳳蹴瑤華散龍銜桂子香西瓜云

一片冷截潭底月六彎斜卷隴頭雲烹茶
 云簾捲綠陰花外月玉山水雪醉扶翁凌
 霄花云啼鳥倒銜金羽舞驚虵斜倚玉簾
 飛威錦堂樂府云鳳環捧席帶香屏鯨杯
 倚伎和雲捲屏疑作憑此類尚多人亦多贈南
 雲詩者李子遷云石鼎夜聯詩筆健布囊
 春醉酒錢麓真南雲傳神詩也壬辰兵亂
 為順天軍將領所得知其名竊議欲挈之

北歸館於州之瑞雲觀南雲明日見將領
自言云我不能住君家瑞雲觀也不數日
病卒後復有見之淮上者

宮詞

水曲朱門綺漾漫一簾花雨月波寒金閨背襯鴛
鴦冷春困秋千立画干

南園湖石

翠雀銜雲隋翠蕪砥峯倒影卧平湖飛花不到穿

簾月高倚晴天一劍孤

馴鶴圖

張伯玉家画幀宮人徐行以手整釵
一鶴後隨謂之馴鶴圖伯玉請賦詩
欽叔常苦其作詩多不
用韻限以釵來苔三字

寢處粧鉛未捲釵孤雲花帶月邊來六宮簾幕金
鸞冷露溼晨煙啄翠苔

雜詩二首

白露沙灘浸綠湄小舟艤岸尚依稀山回屏曲江
連樹春鎖人家深處歸

又

暗悲秋色素團團一雨飄零颺霽寒天淨長空州
歛處彩虹金挂樹頭山

宮體 二首

紅葉鋪霜撼御階繡蓮塵蹴襯羅鞋袖沾鸞翅調
簧語隋却銜翹入鬢釵

又

騎馬金籠藉草歸翠鸞屏曲染紅霏凭欄山色春

風裏喚得鶯兒燕子飛

照了居士王彧 四首

彧字子文洛州人承安中進士資剛決不
可犯爲尚書省掾知管差除與郎官相可
否即棄官去往來登封盧氏山中改名知
非字無咎自號照了居士居山中二十年
布衣蔬食井臼自親時人哀苦之而知非
處之自若也少日爲文工於四六詩亦有

功和二宋落花韻四首云曾見嬌窺宋玉
墻忽驚遺夢到延涼聚塵非分侵凌玉流
水無情葬送香錦鞵謾拖終隔面綵灰雖
吐若為腸蒼苔碧草無窮恨木石癡兒亦
自傷可人未厭出鄰墻回首空殘翠幕涼
好事只傳懷夢草殊鄉誰致逐魂香塵凝
燕子慵開眼煙暗馬嵬空斲腸穠李絳桃
俱異物為歌薤露寫餘傷綠影浮空只自

傷賞心死著未能忘瓊枝不解留春色銀
燭空曾照夜妝肺腑已傳蜂蜜盡肌膏仍
與燕泥香情知青帝回車日合有祥風老
退房韶華終竟合凋傷獻笑縈懷恣遠忘
露豎不禁昏淚臉風披無奈醉愁妝芳菲
頓減園林趣狼藉空餘陌路香却憶班姬
浪辛苦一生都得幾專房既學佛作決定
歌禪家以為證道新豐之後無有及者初

出京有詩云親疎俱穩人倫了婚嫁齊成
俗意周一筆盡鉤塵債斷都無虧欠大家
休休休休愛著何時是徹頭風息浪平人
已渡笑攜明月下孤舟崧山中云撒手寧
論萬丈崖脚跟未肯點塵埃東君也自魔
君數故著青紅眼底來來何遲去何早二
五不多十不少一聲柄木徧虛空誰識堂
堂真照了又贈安居士國寶云不招措大

真不喚王子文不惹禪和笑不名王照了
他人怕人嫌照了要人嫌人人有面樹有
皮努力方便勤粧嚴粧嚴也由賢不然也
由賢鼻孔莫遣他人穿又答國寶云幻人
誰拙復誰能游戲何妨傀儡棚凡事不堪
君莫怪儂家面目得人憎又云忽然識破
虛空我六合縱橫更有誰正大壬辰參知
政事宗室思烈行臺洛陽以知非有重名

力致之使叅議臺事城陷不知所終子升
卿有賦聲早卒

禪頌三首

昧已全拋大事憂為渠剛攬等閑愁桑榆晚景無
多子針芥人身豈易投閑日構一作來忙日用此
生迷却再生休鼻頭換轉從今始看作回程火裏
牛

又

吾身非我底為情說著塵勞特地驚五九盡時山
更好澗泉雲鳥自春聲

又

放下情懷觸處安生涯取取沒多般褐衣襤褸聊
遮赤短髮鬪鬚底用冠一榻省緣資困歌二匙隨

分了飢食也知苦澀人人笑烈日初心不敢謾貞祐

末行臺都尉南征獲武經進士李申之于盱眙左
右司郎中劉光謙達卿潤文官李獻能欽升愛其才

辯欲活之以避嫌不敢也乃託以問事機令軍中
羈管之申之作詩贈主囚者云一飯感君無地報
寸心許國只天知明朝定作長淮鬼馬革仍煩為
累尸又云胷中萬古橫鍾阜一死鴻毛斷不移又
獻書都尉云金國歲歲南侵計所得不能一二州
而軍力折耗殆盡今歲此舉亦曾慮人有議其後
何以禦之乎為公計者不若此南軍大舉斂兵而
退雖屢出無功得全師而返猶可自救不然師老
食殍困頓于堅城之下饒間一行則公受禍不久
矣某軍敗而死固其所也乞于盱眙城下責以不
降之罪以一死見處使人人知之則都尉亦于名
教有功書上之明日申之謀遁歸不果乃殺之欽
并說其臨刑回面南向欣然就戮甚嗟惜之予謂
甲之胷中萬古橫鍾阜與王知非烈日初心不敢
謾皆烈丈夫語
故附見于此

無事道人董文甫 八首

文甫字國華潞人承安中進士為人淳質

恬于世味於心學有所得人知尊敬之而

不知其所以得也子安仁亦學道父子嘗

閒居寶豐閉戶不出以習靜為業朝夕不

繼晏如也國華歷金昌府判官禮部員外

郎昌武軍節度副使正大中以公事至杞

縣自知死期作書與家人及同官又作詩

貽杞縣令佐詩畢擲筆于地以扇障面而逝有和太白山明和尚牧牛圖詩刻石於洛陽其引云夫人有等差教分頓漸上根之人一聞千悟不落階級中智而下必由漸進此人牛次第不得不立心性動靜微妙有無學者所宜諦觀也以人牧牛是動而有制從有以觀其微者也進退而不已則漸至於回首馴服從無以觀其妙者也

有入于無微及于妙固善矣又不如靜而無礙之爲愈也靜而無礙又不如兩忘雙泯之入神也若夫人牛兩忘明月獨照恍然俱失所在當是時也吾將離形去智神亦無功同于大通與道爲一則向之人牛亦筌蹄中一微塵耳吾儒所謂盡心盡性者無外於是因借明和尚韻再下一轉語會心者必能知之詩不錄

秋夜

見即如無爐上雪淡而有味水中鹽齊行定慧千
燈焰淨識乾坤一鏡奩

晝眠

莊周先我復天真化蝶飛來管領春我亦莊周周
亦蝶不知若箇是真身

審是堂

按劍人人駭夜光蜀雞合道勝鸞鳳飛蛾可是無

分別直道油燈是太陽

文中子續經

紛紛述作史才雄聽似秋來百草蟲不是春雷轟

蟄窟蚓蛇會得化成龍

予嘗以王氏六經為問先生云王氏六經以權道設

教雖孔子亦然但後人不能知之耳因以此詩見示

臨終詩四首

無情喪主沒錢僧送上城南無事人檢盡傳燈無
盡錄更無公案遮畚新

又

生有地死有處萬牛不能移一步一輪明月印天心此是渠儂住處住

又

白髮三千丈紅塵六十年只今無見在虛費草鞋

錢

又

今古一輪月分明印碧霄門門蟾影到處處桂香

飄不起眼中暈何勞指上標真空渾照破歸去杖頭挑

○隱德

薛繼先 四首

繼先字曼卿猗氏人少日三赴廷試南渡後隱居洛西山中課童子學事母孝與人交謙遜和雅所居人化之子純孝字方炸有父風客有詐為曼卿書就方叔取物者

曼卿年已老狀貌如少壯人客不知其爲
曼卿而以爲方叔也而與之書曼卿如書
所取物付之雖其家人亦不以語之也監
察御史石玠子堅行部過曼卿曼卿避不
之見或言君何無鄉曲情耶曼卿曰君未
之思耳凡今時政未必皆善石御史一有
所劾則必謂自我發之同惡相庇他日并
鄰里有受禍者其畏慎類此正大末司農

卿楊慥叔玉丞康錫伯祿薦曼卿與汴人
高仲振武陟宋可武清張潛磁陽曹珏大
名王汝梅隱操不減古人朝廷議授以官
以兵亂不果曼卿喜作詩工于賦物如松
化石云瘦見千年傲霜骨鍊成一片補天
心時人稱焉壬辰之亂病没于宜陽仲振
字正之系出遼東其兄領開封鎮兵正之
幼就舉選年四十後即以家業付其兄挈

妻子居嵩山於書無不讀而以易皇極書
爲業安貧樂道不入城市山野小人亦知
敬之王汝梅張潛從之學三人行山谷間
人望正之風袖翩然如欲仙而未舉也張
王說正之嘗遇異人教之養生呼吸吐納
日以為常靈氣時至安坐不動而骨節屢
屢有聲恍惚中時與真靈接對所談皆世
外事既不以語人故無得而傳潛字仲針

有志節慕荆軻聶政之爲人三十歲乃折
節讀書太學諸人高其行義有張古人之
目客嵩山從正之學易五十歲始娶妻妻
魯山孫氏亦有賢行夫婦相敬如賓負薪
拾穗行歌自得大用與之同業而生理優
賒伶高張之貧時有餽餉皆謝不受鄉里
爲仲升劬瓜田瓜熟仲升約中分之以償
其勤衆不忍但小摘而去仲升亦棄瓜不

收衆如約然後取食之嘗行道中拾得一
斧夫婦計度移時乃持婦就訪其主婦之
所居寺庄有兄弟分財致諍者其弟指仲
升所居曰我家如此獨不畏張先生笑人
耶天興之兵避於少室絕頂時世已亂寇
效暴橫無復人理仲升不甘與之處閉口
不食七日而死婦隨亦投絕澗中汝梅字
大用律學出身伊陽簿秩滿遂不出仕嗜

讀書動有禮法生徒以法理就學者兼以
經學授之後生輩服其教無敢為非義者
可字予之貞祐之兵其姑嫁大姓橐氏夫
與子皆兵死而貲產獨在姑以白金五十
笏遺予之予之受不辭一日姑得橐之疎
屬立爲後挈之省外家予之置酒會鄉鄰
且謂姑言姑往時遺可以金可以橐氏無
子故受之姑今有子矣此金橐氏物非姑

物也我何名取之因呼妻子昇金出婦之
 橐氏鄉里用是重之大兵再駐山陽軍中
 有聞予之之名者問知所在質其子使人
 招之曰肯從我者禍福與公共之不然公
 之子死矣親舊競勸之往予之不從曰吾
 有子無子與吾兒之光與生皆有命焉豈
 以一子故併平生所守者而亡之乎其後
 予之竟以無子死珏字子玉早歲有賦聲

誠實樂易世俗事皆所不知喜賓客

款於接物無書不習從之游者樂之而

不厭也六人者亂後惟子玉居弘州十

二年乃終

九日感懷

曼卿

衰年易感我今知無訝騷人動楚悲故國久拋兵
 劫後佳辰多負菊花期一時蘭艾同凋落兩鬢雪
 霜仍別離高世輸他陶靖節悠然高興滿東籬

過洛陽

子之

西來東去洛陽城千尺浮圖了送迎十日酒旗歌
板地白頭孤客可憐生

寄人宰縣

仲升

縣務無難易人才自異同割雞良暫屈製錦要專
工積弊姦賊後遺黎喘汗中不存憂世志底用讀
書切嫉惡看平日知君有古風莫教循吏傳獨載

魯山翁

載方言作
上聲呼

白髮感懷

子玉

少年豪舉氣如虹今日蕭然一病翁曉鏡祇添頭
上雪春風不綠鬢遠蓬文章那作一錢直燈火空
勞半世功擬築精丘便歸老醉鄉何者是窮通

中州集卷第十 終

